

नमो नमो निम्मलदंसणस्स
पू. आनंद-क्षमा-ललित-सुशील-सुधर्मसागर गुरुभ्यो

30/2

चंदावेज्झय-सत्तमं पईण्णगसूत्तं

मूनि दीपरत्नसागर

Date: / / 2012

Jain Aagam Online Series 30/1

गंथाणककमो

कमं	विसय	सूतं	गाहा	अणूककम	पिट्ठंको
१	मंगलं-दार निरुवणं	—	१-३	१-३	०३- --
२	विनयगुण-दारं	—	४-२१	४-२१	०३-०४
३	आयरिय-दारं	—	२२-३६	२२-३६	०४-०५
४	सीस-दारं	—	३७-५३	३७-५३	०५-०६
५	विनय-निग्गह-दारं	—	५४-७१	५४-७१	०६-०७
६	नाण-गुण-दारं	—	७२-९९	७२-९९	०७-०८
७	चरण-गुण-दारं	—	१००-११६	१००-११६	०८-०९
८	मरण-गुण-दारं	—	११७-१७२	११७-१७२	०९-१२
९	उपसंहार	—	१७४-१७५	१७४-१७५	१२-

- [१] जगमत्ययत्थयाणं विगसियवरणाण-दंसणधराणं ।
नाणुज्जोयगराणं लोगम्मि नमो जिनवराणं ॥
- [२] इणमो सुणह महत्थं निस्संदं मोक्खमग्गसुत्तस्स ।
विगहनियत्तियचित्ता सोऊण य मा पमाइत्था ॥
- [३] विनयं आयरियगुणे सीसगुणे विणयनिग्गहगुणे य ।
नाणगुणे चरणगुणे मरणगुणे एत्थ वोच्छामि ॥
- [४] जो परिभवइ मणूसो आयरियं जत्थ सिक्खए विज्जं ।
तस्स गहिया वि विज्जा दुःक्खेण वि अप्फला होइ ॥
- [५] थद्धो विणयविहूणो न लभइ कित्तिं जसं च लोगम्मि ।
जो परिभवं करेई गुरुण गरुयाए कम्माणं ॥
- [६] सव्वत्थ लभेज्ज नरो विस्संभं सच्चयं च कित्तिं च ।
जो गुरुजणोवइट्ठं विज्जं विणएण गेण्हेज्ज ॥
- [७] अविणीयस्स पणस्सइ जइ वि न नस्सइ न नज्जइं गुणेहिं
।
विज्जा सुसिक्खिया वि हु गुरुपरिभवबुद्धिदोसेणं ॥
- [८] विज्जा मणुसरियव्वा न दुव्विणीयस्स होइ दायव्वा ।

परिभवइ दुव्विणीओ तं विज्जं तं च आयरियं ॥

- [१] विज्जं परिभवमाणो आयरियाणं गुणेऽपयासितो ।
रिसिघायगाण लोयं वच्चइ मिच्छत्तसंजुतो ॥
- [१०] विज्जा वि होइ विलिया गहिया पुरिसेणऽभागधेज्जेण ।
सुकुलकुलवालिया विव असरिसपुरिसं पइं पत्ता ॥
- [११] सिक्खाहि ताव विनयं किं ते विज्जाइ दुव्विणीयस्स ।
दुस्सिक्खिओ हु विनओ सुलभा विज्जा विणीयस्स ॥
- [१२] विज्जं सिक्खह विज्जं गुणेह गहियं च मा पमाएह ।
गहिय-गुणिया हु विज्जा परलोयसुहावहा होइ ॥
- [१३] विनएण सिक्खियाणं विज्जाणं परिसमत्तसुत्ताणं ।
सक्का फलमणुभुत्तुं गुरुजणतुट्ठोवइट्ठाणं ॥
- [१४] दुल्लहया आयरिया विज्जाणं दायगा समत्ताणं ।
ववगयचउक्कसाया दुल्लहया सिक्खगा सीसा ॥
- [१५] पव्वइयस्स गिहिस्स व विनयं चेव कुसला पसंसंति ।
न हु पावइ अविणीओ कितिं च जसं च लोगम्मि
- [१६] जाणंता वि य विनयं केई कम्माणुमायदोसेणं ।
नेच्छंति पउंजिता अभिभूया एग-दोसेहिं ॥
- [१७] अभणंतस्स वि कस्स वि पहरइ किती जसो य लोगम्मि ।
पुरिसस्स महिलियाए विनीयविनयस्स दंतस्स ॥
- [१८] देंति फलं विज्जाओ पुरिसाणं भागधेज्जपरियाणं ।
न हु भागधेज्जपरिविज्जयस्स विज्जा फलं देति ॥
- [१९] विज्जं परिभवमाणो आयरियाणं गुणेऽपयासितो ।
रिसिघायगाण लोयं वज्जइ मिच्छत्तसंजुतो ॥
- [२०] न हु सुलहा आयरिया विज्जाणं दायगा समत्ताणं ।

- उज्जुय अपरितंता न हु सुलहा सिक्खगा सीसा ।
 [२१] विनयस्स गुणविसेसा एए मए वण्णिया समासेणं न ।
 आयरियाणं च गुणे एगमणा मे निसामेह ॥
- [२२] वोच्छं आयरियगुणे अनेगगुणसयसहस्सधारीणं ।
 ववहारदेसगाणं सुयरयणसुसत्थवाहाणं ॥
- [२३] पुढवी विव सव्वसहं मेरु व्व अकंपिरं ठियं धम्मं ।
 चंदं व सोमलेसं तं आयरियं पसंसंति ॥
- [२४] अपरिस्साविं आलोयणारिहं हेउ-कारणविहन्नुं ।
 गंभीरं दुद्धरिसं तं आयरियं पसंसंति ॥
- [२५] कालन्नु देसन्नु समयन्नु अतुरियं असंभंतं ।
 अनुवत्तयं अमायं तं आयरियं पसंसंति ॥
- [२६] लोइय-वेइय-सामाइएसु सत्थेसु जस्स वक्खेवो ।
 ससमय-परसमयविऊ तं आयारियं पसंसंति ॥
- [२७] बारसहि वि अंगेहिं सामाइयमाइपुव्वनिब्बद्धे ।
 लद्धट्ठं गहियट्ठं तं आयरियं पसंसंति ॥
- [२८] आयरियसहस्साइं लहइ य जीवो भवेहिं बहुएहिं ।
 कम्मसेसु य सिप्पेसु य अन्नेसु य धम्मचरणेसु ॥
- [२९] जे पुण जिनोवइट्ठे निणंथे पवयणम्मि आयरिया ।
 संसार-मोक्खमग्गस्स देसगा तेसत्थ आयरिया ॥
- [३०] जह दीवा दीवसयं पइप्पए सो य दिप्पए दीवो ।
 दीवसमा आयरिया दिप्पंति परं च दीवेति ॥
- [३१] धन्ना आयरियाणं निच्चं आइच्च-चंदभूयाणं ।
 संसारमहण्णवतरयाण पाए पणिवयंति ॥
- [३२] इहलोइयं च कित्तिं लभंति आयरियभत्तिराएणं ।
 देवगइं सुविसुद्धं धम्मं य अनुत्तरं बोहिं ॥
- [३३] देवा वि देवलोए निच्चं दिव्वोहिणा वियाणिता ।
 आयारियाण सरंता आसण-सयणाणि मुच्चंति ॥

- [३४] देवा वि देवलोए निग्गंथं पवयणं अनुसरंता ।
अच्छरगणमज्झगया आयरिए वंदया एंति ॥
- [३५] छट्ठऽट्ठम-दसम-दुवालसेहिं भत्तेहिं उववसंता वि ।
अकरंता गुरुवयणं ते होंति अनंतसंसारी ॥
- [३६] एए अन्ने य बहू आयरियाणं गुणा अपरिमेज्जा ।
सीसाण गुणविसेसे केइ समासेण वोच्छामि ॥
- [३७] नीयाविति विणीयं ममत्तमं गुणवियाणयं सुयणं ।
आयरियमइवियाणिं सीसं कुसला पसंसंति ॥
- [३८] सीयसहं उण्हसहं वायसहं खुह-पिवास-अरइसहं ।
पुढवी विव सव्वसहं सीसं कुसला पसंसंति ॥
- [३९] लाभेसु अलाभेसु य अविवन्नो जस्स होइ मुहकण्णो ।
अप्पिच्छं संतुट्ठं सीसं कुसला पसंसंति ॥
- [४०] छव्विहविणयविहन्नू अज्जविओ सो हु वुच्चइ विणीओ ।
इड्ढीगारवरहियं सीसं कुसला पसंसंति ॥
- [४१] दसविहवेयावच्चम्मि उज्जुयं उज्जयं च सज्जाए ।
सव्वावासगजुत्तं सीसं कुसला पसंसंति ॥
- [४२] आयरियवण्णवाइं गणसेविं कित्तिवद्धणं धीरं ।
धीधणियबद्धकच्छं सीसं कुसला पसंसंति ॥
- [४३] हंतूण सव्वमाणं सीसो होऊणं ताव सिक्खाहि ।
सीसस्स होंति सीसा न होंति सीसा असीसस्स ॥
- [४४] वयणाइं सुकड्डयाइं पणयनिसिट्ठाइं विसाहियव्वाइं ।
सीसेणाऽऽयरियाणं नीसेसं मग्गमाणेणं ॥
- [४५] जाइ-कुल-रूव-जोव्वण-बल-विरिय-समत्तसत्तसंपन्नं ।
मिउ मद्दवाइमपिसुणमसढमथद्धं अलोभं च ॥
- [४६] पडिपुन्नपाणि-पायं अनुलोमं निद्ध-उवचियसरीरं ।
गंभीर-तुंगनासं उदारदिट्ठिं विसालच्छं ॥
- [४७] जिनसासणमनुरत्तं गुरुजणमुहपिच्छरं च धीरं च ।

- सद्धागुणपरिपुन्नं विकारविरयं विनयमूलं ॥
- [४८] कालन्नु देसन्नु समयन्नु सील-रूव-विणयन्नु ।
लोह-भय-मोहरहियं जियनिद्द-परीसहं चेव ॥
- [४९] जइ वि सुयणाणकुसलो होइ नहरो हेउ-कारणविहन्नु ।
अविणीयं गारवियं न तं सुयहरा पसंसंति ॥
- [५०] सीसं सुइमनुरत्तं निच्चं विणओवयारसंपन्नं ।
वाएज्ज व गुणजुत्तं पवयणसोहाकरं धीरं ॥
- [५१] एत्तो जो परिहीणो गुणेहिं गुणसयनओववेएहिं ।
पुत्तं पि न वाएज्जा किं पुण सीसं गुणविहूणं ॥
- [५२] एसा सीसपरिक्खा कहिया निउणेत्थ सत्थउवेइट्ठा ।
सीसो परिक्खयव्वो पारत्तं मग्गमाणेणं ॥
- [५३] सीसाणं गुणकित्ती एसा मे वण्णिया समासेणं ।
विनयस्स निग्गहगुणे ओहियहियया निसामेह ॥
- [५४] विनओ मोक्खदारं विनयं मा हू कयाइ छइडेज्जा ।
अप्पसुओ वि हु पुरिसो विणएण खवेइ कम्मइं ॥
- [५५] जो अविणीयं विणएण जिणइ सीलेण जिणइ निस्सीलं ।
सो जिणइ तिण्णि लोए पावमपावेण सो जिणइ ॥
- [५६] जइ वि सुयणाणकुसलो होइ नरो हेउ-कारणविहन्नु ।
अविणीयं गारवियं न तं सुयहरा पसंसंति ॥
- [५७] सुबहुस्सुयं पि पुरिसं पुरिसा अप्पस्सुयं ति ठावेंति ।
गुणहीण विनयहीणं चरित्तजोगेणं पासत्थं ॥
- [५८] तव-नियम-सीलकलियं उज्जुत्तं नाण-दंसण-चरित्ते ।
अप्पस्सुयं पि पुरिसं बहुस्सुयपयम्मि ठावेंति ॥
- [५९] सम्मत्तम्मि य नाणं आयत्तं दंसणं चरित्तम्मि ।
खंतिबलाओ य तवो, नियमविसेसो य विणयाओ ॥
- [६०] सव्वे य तवविसेसा नियमविसेसा य गुणविसेसा य ।
नत्थि हु विणओ जेसिं मोक्खफलं निरत्त्ययं तेसिं ॥

- [६१] पुच्छिं परूविओ जिणवरेहिं विनओ अनंतनाणीहिं ।
सव्वासु कम्मभूमिसु निच्चं चिय मोक्खमग्गम्मि ॥
- [६२] जो विनओ तं नाणं जं नाणं सो उ वुच्चई विनओ ।
विणएणं लहइ नाणं नाणेण विजाणई विनयं ॥
- [६३] सव्वो चरितसारो विणयम्मि पइट्ठिओ मणूसाणं ।
न हु विनयविप्पहीणं निग्गंथरिसी पसंसंति ॥
- [६४] सुबहुस्सुओ वि जो खलु अविणीओ मंदसद्ध-संवेगो ।
नाराहेइ चरितं चरित्तभट्ठो भमइ जीवो ॥
- [६५] थोवेण वि संतुट्ठो सुएण जो विनयकरणसंजुतो ।
पंचमहव्वयजुतो गुतो आराहओ होइ ॥
- [६६] बहुयं पि सुयमहीयं किं काही विनयविप्पहीणस्स ।
अंधस्स जह पलिता दीवसयसहस्सकोडी वि ॥
- [६७] विणयस्स गुणविसेसा एए मए वण्णिया समासेणं ।
नाणस्स गुणविसेसा ओहियकण्णा निसामेह ॥
- [६८] न हु सुक्का नाउं जे नाणं जिणदेसियं महाविसयं ।
ते धन्ना जे पुरिसा नाणी य चरित्तमंता य ॥
- [६९] सक्का सुएण नाउं उड्ढं च अहं च तिरियलोयं च ।
ससुराऽसुरं समणुयं सगरुल-भुयगं सगंधव्वं ॥
- [७०] जाणंति बंध-मोक्खं जीवाऽजीवे य पुन्न-पावे य ।
आसव संवर निज्जर तो किर नाणं चरणहेउं ॥
- [७१] नायाणं दोसाणं विवज्जणा सेवणा गुणाणं च ।
धम्मस्स साहणाइं दोन्नि वि किर नाणसिद्धाइं ॥
- [७२] नाणी वि अवट्ठंतो गुणेसु दोसे य ते अवज्जित्तो ।
दोसाणं च न मुच्चइ तेसिं न वि ते गुणे लहइ ॥
- [७३] नाणेण विणा करणं करणेण विणा न तारयं नाणं ।
भवसंसारसमुद्दं नाणी करणट्ठिओ तरइ ॥
- [७४] अस्संजमेण बद्धं अत्राणेण य भवेहिं बहुएहिं ।

- कम्ममलं सुभमसुभं करणेण दढो धुणइ नाणी ॥
- [७५] सत्थेण विणा जोहो जोहेण विणा य जारिसं सत्थं ।
नाणेण विणा करणं करणेण विणा तहा नाणं ॥
- [७६] नादंसणिस्स नाणं न वि अन्नाणिस्स होंति करणगुणा ।
अगुणस्स नत्थि मोक्खो नत्थि अमुत्तस्स नेव्वाणं ॥
- [७७] जं नाणं तं करणं जं करणं पवयणस्स सो सारो ।
जो पवयणस्स सारो सो परमत्थो त्ति नायव्वो ॥
- [७८] परमत्थगहियसारा बंधं मोक्खं च ते वियाणंता ।
नाऊण बंध-मोक्खं खवेत्ति पोराणयं कम्मं ॥
- [७९] नाणेण होइ करणं करणं नाणेण फासियं होइ ।
दोण्हं पि समाओगे होइ विसोही चरित्तस्स ॥
- [८०] नाणं पगासगं सोहओ तवो संजमो य गुत्तिकरो ।
तिण्हं पि समाओगे मोक्खो जिनसासणे भणिओ ॥
- [८१] किं एतो लट्ठयरं अच्छेरतरं च सुंदरतरं च ।
चंदमिव सव्वलोगा बहुस्सुयमुहं पलोएंति ॥
- [८२] चंदाओ नीइ जोणहा बहुस्सुयमुहाओ नीइ जिनवयणं ।
जं सोऊण मणूसा तरंति संसारकंतारं ॥
- [८३] सूई जहा ससुत्ता न नस्सई कयवरम्मि पडिया वि ।
जीवो तहा ससुत्तो न नस्सइ गओ वि संसारे ॥
- [८४] सूई जहा असुत्ता नासइ सुत्ते अदिस्समाणम्मि ।
जीवो तहा असुत्तो नासइ मिच्छत्तसंजुत्तो ॥
- [८५] परमत्थम्मि सुदिट्ठे अविणट्ठेसु तव-संजमगुणेसु ।
लब्भइ गई विसिट्ठा सरीरसारे विणट्ठे वि ॥
- [८६] जह आगमेव वेज्जो जाणइ वाहिं चिगिच्छिउं निउणो ।
तह आगमेण नाणी जाणइ सोहिं चरित्तस्स ॥
- [८७] जह आगमेणं हीणो वेज्जो वाहिस्स न मुणइ तिगिच्छं ।
तह आगमपरिहीणो चरित्तसोहिं न याणाइ ॥

- [८८] तम्हा तित्थयरपरुवियम्मि नाणम्मि अत्थजुत्तम्मि ।
उज्जोओ कायव्वो नरेण मोक्खाभिकामेण ॥
- [८९] बारसविहम्मि वि तवे सब्भित्तर-बाहिरे जिणक्खाए ।
न वि अत्थि न वि य होही सज्झायसमं तवोकम्मं ॥
- [९०] मेहा होज्ज न होज्ज व जं मेहा उवसमेण कम्माणं ।
उज्जोओ कायव्वो नाणं अभिकंखमाणेणं ॥
- [९१] कम्मसंखेज्जभवं खवेइ अनुसमयमेवे आउत्तो ।
बहुभवसंचियय पि हु सज्झाएणं खणे खवइ ॥
- [९२] सतिरिय-सुराऽसुरनरो सकिन्नर-महोरगो सगंधव्वो ।
सव्वो छउमत्थजणो पडिपुच्छइ केवलिं लोए ॥
- [९३] एककम्मि वि जम्मि पए संवेगं वच्चए नरोऽभिकखं ।
तं तस्स होइ नाणं जेण विरागतणमुवेइ ॥
- [९४] एककम्मि वि जम्मि पए संवेगं वीयरागमग्गम्मि ।
वच्चइ नरो अभिकखं तं मरणंते न मोत्तव्वं ॥
- [९५] एककम्मि विजम्मि पए संवेगं कुणइ वीयरायमए ।
सो तेण मोहजालं खवेइ अज्झप्पजोगेणं ॥
- [९६] न हु मरणम्मि उवग्गे सक्का बारसविहो सुयक्खंधो ।
सव्वो अनुचिंतेउं धणियं पि समत्थवित्तेणं ॥
- [९७] तम्हा एककं पि पयं चिंतंतो तम्मि देस-कालम्मि ।
आराहणोयउत्तो जिणेहि आराहगो भणिओ ॥
- [९८] आराहणोवउत्तो सम्मं काऊण सुविहिओ कालं ।
उक्कोसं तिण्णि भवे गंतूण लभेज्ज निव्वाणं ॥
- [९९] नाणस्स गुणविसेसा केइ मए वण्णिया समासेणं ।
चरणस्स गुणविसेसा ओहियहियया निसामेह ॥
- [१००] ते धन्ना जे धम्मं चरिउं जिनदेसियं पयत्तेणं ।
गिहपासबंधणाओ उम्मुक्का सव्वभावेणं ॥
- [१०१] भावेण अनन्नमणा जे जिनवयणं सया अनुचरंति ।

- ते मरणम्मि उवग्गे न विसीयंती गुणसमिद्धा ॥
- [१०२] सीयंति ते मणूसा सामण्णं दुल्लहं पि लद्धूणं ।
जदोहस्पा न निउत्तो दुक्खविमोक्खम्मि मग्गम्मि ॥
- [१०३] दुक्खाण ते मणूसा पारं गच्छंति जे य दढ्धीया ।
भावेण अनन्नमणा पारत्तहियं गवेसंति ॥
- [१०४] मग्गंती परमसुहं ते पुरिसा जे खवंति उज्जुत्ता ।
कोहं मानं मायं लोभं अरनइं दुगुंछं च ॥
- [१०५] लद्धूण विमाणुस्सं सुदुल्लहं जे पुणो विराहेंति ।
ते भिन्नपोयसंजत्तिगा व पच्छा दुही होंति ॥
- [१०६] लद्धूण वि सामण्णं पुरिसा जोगेहिं जे न हायंति ।
ते लद्धपोयसंजत्तिगा व पच्छा न सोयंती ॥
- [१०७] न हु सुलहं माणुस्सं लद्धूण वि होइ दुल्लहा बोही ।
बोहीए वि य लंभे सामण्णं दुल्लहं होइ ॥
- [१०८] सामण्णस्स वि लंभे नामाभिगमो उ दुल्लहो हवइ ।
नाणम्मि वि आगमिए चरित्तसोही हवइ दुक्खं ॥
- [१०९] अत्थि पुण केइ पुरिसा सम्मत्तं नियमसो पसंसंति ।
केई चरित्तसोहिं नाणं च तहा पसंसंति ॥
- [११०] सम्मत्त-चरित्ताणं दोण्ह पि समागयाण संताणं ।
किं तत्थ गेण्हियव्वं पुरिसेणं बुद्धिमंतेणं ॥
- [१११] सम्मत्तं अचरित्तस्स हवइ जह कण्ह-सेणियाणं तु ।
जे पुण चरत्तमंता तेसिं नियमेण सम्मत्तं ॥
- [११२] भट्ठेण चरित्ताओ सुट्ठयरं दंसणं गहेयव्वं ।
सिज्झंति चरणरहिया दंसणरहिया न सिज्झंति ॥
- [११३] उक्कोसचरित्तो वि य पडेइ मिच्छत्तभावओ कोइ ।
किं पुण सम्मद्दिट्ठी सरागधम्मम्मि वट्ठंतो ॥
- [११४] अविरहिया जस्स मई पंचहिं समिईहिं तिहिं वि गुत्तीहिं ।
न य कुणइ राग दोसे तस्स चरित्तं हवइ सुद्धं ॥

- [११५] तम्हा तेसु पवत्तह कज्जेसु य उज्जमं पयत्तेणं ।
सम्मत्तम्मि चरित्ते नाणम्मि य मा पमाएह ॥
- [११६] चरणस्स गुणविसेसा एए मए वण्णिया समासेणं ।
मरणस्स गुणविसेसा अवहियहियया निसामेह ॥
- [११७] जह व अनियमियतुरगे अयाणमाणो नरो समारूढो ।
इच्छेज्ज पराणीयं अइगंतुं जो अकयजोगो ॥
- [११८] सो पुरिसो सो तुरगो पुव्विं अनियमियकरणजोएण ।
दट्ठुण पराणीयं मज्जंती दो वि संगामे ॥
- [११९] एयमकारिजोगो पुरिसो मरणे उवट्ठिए संते ।
न भवइ परीसहसहो अंगेसु परीसहनिवाए ॥
- [१२०] पुव्विं कारियजोगो समाहिकामो य मरणकालम्मि ।
भवइ य परीसहसहो विसयसुहनिवारिओ अप्पा ॥
- [१२१] पुव्विं कयपरिकम्मो पुरिसो मरणे उवट्ठिए संते ।
छिंदइ परीसहमिणं निच्छायपरसुप्पहारेणं ।
- [१२२] दाहिंति इंदियाइं पुव्वमकारियपइन्नचारिस्स ।
अकयपरिकम्म जीवो मुज्झइ आराहणाकाले ॥
- [१२३] आगमसंजुत्तस्स वि इंदियरसलोलुयं पइठस्स ।
जइ वि मरणे समाही हवेज्ज न वि होज्ज बहुयाणं ॥
- [१२४] असमत्तसुओ वि मुणी पुव्विं सुकयपरिकम्मपरिहत्थो ।
संजम-मरणपइन्नं सुहंमव्वहिओ समाणेइ ॥
- [१२५] इंदियसुहसाउलओ घोरपरीसहपरव्वसवित्तो ।
अकयपरिकम्म कीवो मुज्झइ आराहणाकाले ॥
- [१२६] न चएइ किंचि काउं पुव्विं सुकयपरिकम्मबलियस्स ।
खोहं परीसहचमू धीबलविणिवारिया मरणे ॥
- [१२७] पुव्विं कारियजोगो अणियाणो ईहिऊणमइकुसलो ।
सव्वत्थ अपडिबद्धो सकज्जजोगं समाणेइ ॥
- [१२८] उप्पीलिया सरासण गहियाउहचावनिच्छियमईओ ।

- विंधइ चंदगवेज्झं झायंतो अप्पणो सिक्खं ॥
- [१२९] जइ वि करेइ पमायं थेवं पि य अन्नचित्तदोसेणं ।
तह विय कयसंघाणो चंदगवेज्झं न विंधेइ ॥
- [१३०] तम्हा चंदगवेज्झस्स कारणा अप्पामाइणा निच्चं ।
अविरहियगुणो अप्पा कायव्वो मोक्खमग्गम्मि ॥
- [१३१] सम्मतलद्धबुद्धिस्स चरिमसमयम्मि वट्टमाणस्स ।
आलोइय-निंदिय-गरहियस्स मरणं हवइ सुद्धं ॥
- [१३२] जे मे जाणंति जिना अवराहे नाण-दंसण-चरित्ते ।
ते सव्वे आलोए उवट्ठिओ सव्वभावेणं ॥
- [१३३] जो दोन्नि जीवसहिया रंभइ संसारबंधणा पावा ।
रागं दोसं च तहा सो मरणे होइ कयजोगो ॥
- [१३४] जो तिण्णि जीवसहिया दंडा मण-वयण-कायगुत्तीओ ।
नाणंकुसेण गिण्हइ सो मरणे होइ कय जोगो ॥
- [१३५] जो चत्तारि कसाए घोरे ससरीसंभवे निच्चं ।
जिनगरहिए निरंभइ जो मरणे होइ कयजोगो ॥
- [१३६] जो पंच इंदियाइं सन्नाणी विसयसंपलित्ताइं ।
नाणंकुसेण गिण्हइ सो मरणे होइ कयजोगी ॥
- [१३७] छज्जीवकायहियओ सत्तमयठ्ठाण नविरहओ साहू ।
एगंतमद्दवमओ सो मरणे होइ कयजोगो ॥
- [१३८] जेण जिया अट्ठमया गुत्तो चिय नवहिं बंभगुत्तीहिं ।
आउत्तो दसकज्जे सो मरणे होइ कयजोगो ॥
- [१३९] आसायणाविरहिओ आराहितो सुदुल्लहं मोक्खं ।
सुक्कज्झाणाभिमुहो सो मरणे होइ कयजोगो ॥
- [१४०] जो विसहइ बावीसं परीसहा दुस्सहा उवस्सग्गा ।
सुन्ने व आउले वा सो मरणे होइ कयजोगो ॥
- [१४१] धन्नाणं तु कसाया जगडिज्जंता वि परकसाएहिं ।
निच्चंति समुट्ठेउं सुनिविट्ठो पंगुलो चेव ॥

- [१४२] सामण्णमनुचरंतस्स कसाया जस्स उक्कडा हौंति ।
मन्नामि उच्छुपुप्फं य निप्फलं तस्स सामण्णं ॥
- [१४३] जं अज्जियं चरितं देसूणाए वि पुव्वकोडीए ।
तं पि कसाइयमेतो नासेइ नरो मुहुत्तेण ॥
- [१४४] जं अज्जियं च कम्मं अनंतकालं पमायदोसेणं ।
तं निहयराग-दोसो खवेइ पुव्वाण कोडीए ॥
- [१४५] जइ उवसंतकसाओ लहइ अनंतं पुणो वि पडिवायं ।
किह सक्का वीसरिउं थोवे वि कसायसेसम्मि ॥
- [१४६] खीणेसु जाण खेमं जियं जिएसु अमयं अभिहएसु ।
नट्ठेसु याविणट्ठं सोक्खं च जओ कसायाणं ॥
- [१४७] धन्ना निच्चमरागा जिनवयणरया नियतिकसाया ।
निस्संगनिम्ममत्ता विहरंति जहिच्छिया साहू ॥
- [१४८] धन्ना अविरहियगुणा विहरंती मोक्खमग्गमल्लीणा ।
इह य परत्थ य लोए जीविय-मरणे अपडिबद्धा ॥
- [१४९] मिच्छंतं दमिऊणं सम्मत्तम्मि धणियं अहीगारो ।
कायव्वो बुद्धिमया मरणसमुग्घायकालम्मि ॥
- [१५०] हंदि धणियं पि धीरा पच्छा मरणे उवट्ठिए संते ।
मरणसमुग्घाएणं अवसा निज्जंति मिच्छंतं ॥
- [१५१] तो पुव्वं तु मइमया आलोयण निंदणा गुरुसगासे ।
कायव्वा अनुपुव्विं पव्वज्जाईओ जं सरइ ॥
- [१५२] ताहे जं देज्ज गुरु पायच्छित्तं जहारिहं जस्स ।
इच्छामि ति मणिज्जा अहमवि नित्यारिओ तुब्भे ॥
- [१५३] परमत्थओ मुणीणं अवराओ नेव होइ कायव्वो ।
छलियस्स पमाएणं पडिच्छत्तमवस्स कायव्वं ॥
- [१५४] पच्छित्तेणं विसोही पमायबहुलस्स होइ जीवस्स ।
तेण तयंकुसमयं चरियव्वं चरणक्खट्ठा ॥
- [१५५] न वि सुज्झंति ससल्ला जह भणियं सव्वभायदंसीहिं ।

- मरण-पुणब्भवरहिया आलोयण-निंदणा साहू ॥
- [१५६] एककं ससल्लमरणं मरिऊण महब्भयम्मि संसारे ।
पुणरदि भमंति जीवा जम्मण-मरणाइं बहुयाइं ॥
- [१५७] पंचसमिओ तिगुत्तो सुचिरं कालं मुणी विहरिऊणं ।
मरणे विराहयंतो धम्ममणाराहओ भणिओ ॥
- [१५८] बहुमोहो विहरिता पच्छिमकालम्मि संवुडो सो उ ।
आराहणोवउत्तो जिणेहिं आराहओ भणिओ ॥
- [१५९] तो सव्वाभावसुद्धो आराहणमइमुहो विसंमंतो ।
संयारं पडिवन्नो इमं च हियणए चिंतेज्जा ॥
- [१६०] एगो मे सासओ अप्पा नाण-दंसणसंजुओ ।
सेसा मे बाहिरा भावा सव्वे संजोगलक्खणा ॥
- [१६१] एक्को हं नत्थि मे कोई नत्थि वा कस्सई अहं ।
न तं पेक्खामि जस्साहं न तं पेक्खामि जो महं ॥
- [१६२] देवत माणुसतं तिरिक्खजोणिं तहेव नरयं च ।
पत्तो अनंतखुत्तो पुव्विं अन्नाणदोसेणं ॥
- [१६३] न य संतोसं पत्तो सएहिं कप्पेहिं दुक्खमूलेहिं ।
न य लद्धा परिसुद्धा बुद्धी सम्मतसंजुत्ता ॥
- [१६४] सुचिरं पि ते मणूसा भमंति संसारसायरे दुग्गे ।
जे हु करेति पमायं दुक्खविमोक्खम्मि धम्मम्मि ॥
- [१६५] दुक्खाण ते मणूसा पारं गच्छंति जे दढधिईया ।
पुव्वपुरिसामुचिण्णं जिणवयणपहं न मुंचंति ॥
- [१६६] मग्गंति परमसोक्खं ते पुरिसा जे खवंति उज्जुत्ता ।
कोहं मानं मायं लोभं तह राग-दोसं च ॥
- [१६७] न वि माया न वि य पिया न बंधवा न वि पियाइं मिताइं
।
पुरिसस्स मरणकाले न होंति आलंबणं किंचि ॥
- [१६८] न हिरण्ण-सुवण्णं वा दासी दासं च जाण जुग्गं च ।

- पुरिसस्स मरणकाले न होंति आलंबणं किंचि ॥
- [१६९] आसबलं हत्थिबलं जोहबलं धणुबलं रहबलं च ।
पुरिसस्स मरणकाले न होंति आलंबणं किंचि ॥
- [१७०] एवं आराहेतो जिणोवइट्ठं समाहिमरणं तु ।
उद्धरियभावसल्लो सुज्झइ जीवो धुयकिलेसो ॥
- [१७१] जाणंतेण वि जइणा वयाइयारस्स सोहणोवायं ।
परसक्खिया विसोही काव्वा भावसल्लस्स ॥
- [१७२] जह सुकुसलो वि वेज्जो अन्नस्स कहेइ अप्पणो वाहिं ।
सो से करइ तिगिच्छं साहू वि तहा गुरुसगासे ॥
- [१७३] इत्थ समप्पइ इणमो पव्वज्जा मरणकालसमयम्मि ।
जो हु न मुज्झइ मरणे साहू आराहओ भणिओ ॥
- [१७४] विनयं आयरियगुणे सीसगुणे विणयनिग्गहगुणे य ।
नाणगुणे चरणगुणे मरणगुण विहिं च सोऊणं ॥
- [१७५] तह धत्तह काउं जे जह मुच्चइ गब्भवासवसहीणं ।
मरण पुणब्भव-जम्मण-दोग्गइविमिवायगमणाणं ॥

३०/२

‘चंदावेज्झयं’ सत्तमं पइण्णयं समत्तं

मुनि दीपरत्नसागरेण संशोधितः सम्पादितश्च चंदावेज्झयं समत्तं